



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10 Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Shooting Nationals: Bhavesh Shekhawat-i gold angu

COVID tabu tasenba mechi Israel-i tenokdangba agütsür



VOL. XIX NO. 52 (ADOK 52)

DIMAPUR

TENTONÜ (MONDAY) YIMPOKSÜI (NOVEMBER) 29, 2021

₹ 5.00

Union Minister-i asür Capt Kenguruse'er kinunger den ajurutepe



Ajay Bhatt-i Kargil War Hero asür Capt N Kenguruse, MVC'er kibong semdangdang tangokba noksa ka angur.

Dimapur, November 28, 2021 (TYO): November 28, 2021 nü Minister of State for Defence and Tourism, Ajay Bhatt-i Kargil War Hero asür Capt N Kenguruse, MVC'er kibong semdang.

Tanü Union Minister Bhatt-i Capt Kenguruse'er kinungertem den ajurutepe dang pelaba metetdaksü aser yaritsü nangzük.

Captain Neikezhakuo Kenguruse ya July 15, 1974 nü

aso aser pa ya Kohima district kübok Nerhema nunger liasü. Capt Kenguruse ya December 12, 1998 nü Indian Army nung Army Service Corps nung anio.

"Capt Kenguruse arishi küm 25 asüdang linük atema taküm bendanga agütsü aser pai Operation Vijay nung tasütait mapa inyakba atema 'Maha Vir Chakra' agütsüogo" ta PRO (Def) Kohima, Lt Col Sumit K Sharma-i sangdong ka nung ashi.

NIA-i Manipur nung AR amakba ken o benok

Guwahati, November 28, 2021 (Agencies): Manipur nung Assam Rifles amakba atema National Investigation Agency (NIA)-i ken o ka ka benokogo.

November 13 nü Manipur kübok Thinghat tesem nung PLA telungpurtemi amakdang Assam Rifles Commanding Officer Colonel Viplav Tripathi, pa kinungtsü aser tanur den AR jawan 4 tashi tepset.

NIA Ministry of Home Affairs dang iba atema ken o ka benoktsü asüngdanga liasü aser anogo ana tejakdang parnoki temelaba agütsü.

NIA-isa Manipur police dangi iba atema shidi ka züluogo. NIA-i IPC kübok arla balala kübok ken o benokogo aser iba nung India sorkar anema rara menaba aser Unlawful Activities (Prevention) Act (UAPA) dena lir.

SARFAESI Act ajanga rongsenketzung renloktsü: K. Therie

Dimapur, November 28, 2021 (TYO): SARFAESI Act 2002 agizükba sülen küm 19 lir Nagaland State Assembly-i agizükba atema tenüngsang agütsür ta NPCC President, K. Therie-i ashi.

Iba Act ya asen rongsen aser sen aputsürtem asoshi lir anungji kanga tongtipang lir. Sen aputsür aser apur indang tebilemba angatetsüba kanga tongtipang lir aser rongsenketzung renloktsü alizung yur Act shitak inyaka aotsüba asoshi mapa tulu anüngdaka lir, ta pai ashi.

SARFAESI Act 2002 ajanga Arla 371(A) nung kongshir ta Law Department-i State Assembly dang tai tangatetba agütsüba ajanga iba Bill magizükte aru. Iba ajanga küm 20 tashi loan manguba ajanga rongsenketzung tsütsü asenok akoksaogo. Assembly ka mashileni anisabaji ozüng alema

inyakba mapa ka lir aser sorkari tarutsü nungbo ibala majurutsü atema inyakyimtem metongshitsüla, ta K Therie-isa ashi.

Nagaland nung PMRY kübok sen apurtemi magütsüba ajanga khuret tulu ajuru. Ajisüaka iba ya Industry Department tai lir kechiyong parnoki Strengths, Weaknesses, Opportunities and Threats (SWOT) mereprangi nisungtem shim, ta paisa metetdaksü.

"State Assembly nung MLA kari dang iba onük jembi aser MLA aikati tebilemtsü mabener. Anungji taoba mapang Parliament mazüokteti akümba mapang Lok Sabha Speaker asür Somnath Chatterjee-i MP ajak tamakok ngudaktsünür ta ashi aser iba jagi CPM samadok. Anungji taruba election nung tebilemtsü mabenba MLA ajak tamakok ngudaktsünür" ta NPCC President Therie-isa ashi.

Omicron: Centre-i international travel atema SOP reprangshitsü

New Delhi, November 28, 2021 (Agencies): Alima nung linük balalai Covid-19 strain tasenba azüoktsü atema tenokdangbatem agütsüba mapang India kübok state sorkartemia bendanglen nungi arurtem mitba aser Covid tendangba maparen ulushiogo.

Prime Minister Narendra Modi-i Honibarnü mapa junga inyaktsü aser international travel tenokdangba salatsü aliba sentong meyipa reprangshitsü ayongzükogo.

Coronavirus indang Omicron variant ya mezüng November 24 nü South Africa nung putetba osang metetdaksü aser iba variant ya UK, Germany, Italy, Netherlands, Denmark, Belgium, Botswana, Israel, Australia aser Hong Kong linüktem nunga putetba osang lir.

United States, Brazil, Canada, European Union nations, Australia, Japan, South Korea aser Thailand dena linük aikati Africa anüolentip tsütsü nungi arurtem noktanga osang metetdaksüogo.

Prime Minister Narendra

Modi-i senden ka ayonga amenba sülen Deobarnep 11:30 ako meta Home Secretary menden ser rongdak senden ka menogo.

Iba senden nung Dr VK Paul, Member (Health), NITI Aayog, Dr Vijay Raghavan, Principal Scientific Adviser to the Prime Minister aser Health, Civil Aviation aser tanga Ministry tem nungi tongtipang ketdangsurtem aden.

Sorkari international passengers tendangba aser reprangba indang Standard Operating Procedure meyipa reprangshitsü ta senden nung lemtet.

Senden nungsa Airport Health Officials (APHOs) aser Port Health Officials (PHOs) dang kanga akangakanga tendangtsü atema tetuyuba agütsütsü lemtet.

Ita 21 tashi international tayimtsü senzüba noktanga sülen Centre-i November 26 nü December 15 nungi tayimtsü senzütsü osang metetdakja liasü.

"Coronavirus indang

Omicron variant ya 30 ben tema melenshir aser iba ajanga vaccine tem indang tashi jungjunga asadangtsüla" ta AIIMS Director Dr Randeep Guelria-i ashi.

Honibarnü Mumbai Mayor Kishori Pednekar-i South Africa nungi arurtem ajak quarantine asütsü ta osang metetdaksüogo. Külen, Gujarat sorkaria Health Ministry ajanga 'at risk' ta züngoka aliba linüktem nungi arur ajak dak Covid-19 tendangtsü telemteba agiogo.

Bengaluru airport nung South Africa nungi aruba India nung nisung ana dak Covid putetba ajanga ketdangsurtem kanga aoksatepa liasü.

Ajisüaka, tena indang sample ji genome testing atema bener yokba nung delta variant aliba putet, ta ketdangsurtemi ashi.

"COVID-19 variant tasenba atema sorkar department ajak kümküma lir aser nübertem dang nüngdak maliba lokti sentong nung madentsü mepishir" ta Delhi Deputy Chief Minister, Manish Sisodia-ia ashi.

Nagaland nung COVID-19 indang SOPs akangshir

Dimapur, November 28, 2021 (TYO): Chief Secretary menden ser Honibarnü State Level War Room on COVID-19 senden ka menogo.

Iba senden nung COVID-19 tensa meyipa reprangshi aser Health & Family Welfare department-i iba indang osang lemsatet.

Benjung mapang atongba den külemi lokti sentongtem ayonga agiba aser senzüsönonger tali akümba ajanga state sorkari latettsüba SOPs sülen anidaktsü atema mapa talila kar inyaktsü nüngdaker ta senden nung

adenerntem lemtet.

DTF ajak dang lokti sentong ayonga agiba aser sentong nung adenerntem COVID-19 vaccine agiba mita reprangtsü tetuyuba agüja lir. Anungji lateta aliba ama meinyakba atema sentong ayongertem aser shilem agirtem ozüng tapet kübok merenshisüla ta parnokisa metetdaksü.

DTF temisa check posts nung passenger garitem mita reprangtsü tashi agüja lir. Iba mapang parnoki vaccine agiba kulitem meshia reprangtsü aser SOPs sülen manidakertem ozüng tapet agi merenshisü ta

parnokisa ashi.

Talisa, district check gates nung kuli shitak alirtem dang aiddaktsütsüla, ta State Level War Room on COVID-19-isa ashi.

Maneni, NSDMA ajanga lateta aliba ama public tesem nung mask meinokertem dang Rs.200/- senchi achitsü, ta parnokisa tetuyuba agütsüogo.

DTF ajaki ozüng alema inyakerntem merenshiba indang osang NSDMA, Home Department nem anogoshia agütsütsü tuyur, ta State Level War Room on COVID-19-isa metetdaksüogo.

Parliament Winter Session nung mepetmesü adoktsü akok

New Delhi, November 28, 2021 (Agencies): Parliament indang winter session nung mepetmesü adoktsü imlar kechiyong Deobarnü party ajak senden ka nung AAP pur maden oadok.

Tanü senden nung Prime Minister Narendra Modi medentet aser ibaji Opposition party temi aitsür.

Winter session indang mezüng anogo nung aluyimertem indang MSP aser power bills indang benoka jembitsü akok. Iba anogo

nungsa Covid-19 ajanga asür nem teyari agütsütsüba onük benoktsü imlar.

Opposition-isa Pegasus, China-i arrtsü adena inyaksangshiba aser totzü jenjang atuba onüktem Centre den jembitsü renema lir. Parliament mezüng anogo nungsa Farm Laws asem idang bill benoktsü.

BJP aser opposition party tongtiba Congress-i parnok MP tem dang iba anogo adentsü atema tetuyuba agütsüogo.

"Sorkari olemteptsü renema dang lir aser onük koba südir süaka o atsüteptsü. Timi olemteptsüla" ta Minister of state for parliamentary affairs Arjun Ram Meghwal-i ashi.

Parliament indang winter session ya December 23 tashi agitsü aser Covid-19 inyakyim lateta aliba senden 20 ben tashi amentsü.

Iba mapang cryptocurrency regulation, data protection, ED aser CBI directors kümsük atsülangtsü indang dena bill 26 tashi benoktsü akok.

Kohima nung asemnü International Tourism Mart tenzükogo



Kohima, Yimpoksüi/Nov. 28 (TYO): Nagaland Chief Minister Neiphiu Rio, Union Minister of State for Tourism & Defence, GoI, Ajay Bhatt aser MLA & Advisor Tourism, Nagaland H Khehovi Yeputhomi nungertem külemi asemnü atema North East Region asoshi 9 buba International Tourism Mart sentong ka Honibarnü Kohima nung tenzüksü.

Linük telungzük aser bendang lima balala nung aliba market asoshi region nung tourism tsütsü tenjang tajung aliba alima nem metetdaksütsü nükjidong nung iba sentong ya ayongzük. Iba sentong nung Chief Minister Rio-i Nagaland indang Coffee table book ka sayaja liasü.

Kasa sentong nungsa Dimapur nung State Institute of Hotel Management lapoktsü atema Department of Tourism, Government of Nagaland aser Trade Promotion Council of India (TPCI) tsüngta MoU ka zülutepa liasü.

Iba sentong nung jembiba mapang, Kohima nung International Tourism Mart aliba ajanga Nagaland nung kisüng masü saka Northeast ajunga nung tourism aser shishilempaba tsütsü ajungmesotsü imlar, ta Rio-i ashi.

Tourism aser shishilempaba atema linük nung North East ya ajaki sapuba tesem ka akumtsü imlar, ta pai ashi.

Tashidak wara agi tourism sector nung kanga mejungi kongshiogo, saka Ministry of Tourism ajanga iba sentong Kohima nung ayongzükba atema pelar, ta pai ashi.

Ato Kilonser Narendra Modi-i Red Fort nungi ajak dang North East semdangtsü ajungshia liasü, ta Union Minister of State, Bhatt-i iba sentong nung ashi.

"Yangi nüburtemi anepaluba aser tongmelang yimyatem medemdangtsü makok, koba ni ajangshir. Tourism aser sobaliba ya kati ka den sendaktepa lir. Asen sobaliba takar süra, ibaji angatetsü asoshi tourism ya lenmang tajungtiba lir," ta pai ashi.

Iba Tourism Mart nung asenoki domestic tourism nung tali temolung agütsür, ta Bhatt-i ashi.

Iba sentong nung Northeast nungi tayoker 75 shi aser linük nungi talir 50 shi shilem agir.

"Tourism tsütsü iba region nung tesem aika nisungtemi memetet lir. Border tourism aser wildlife tourism tsütsü jenjang tajung lir," ta pai ashi.

Iba sentong ajanga taküm linük tesem balala nungi kaketsü 50-i Northeast India metettsü aser angatetsü maongka nguogo, ta Bhatt-i ashi.

Paisa linük balala nungi ambassador tem dang pei linük nungi tourist tem dang India nung iba region semdangtsü ajungshitsüla, ta ashi.

Northeast nung tourism renloktsü atema Centre-i mapa jenti inyaker, ta ashi.

Ki-o-jen renemtsü atema Government of India-i 'Swadesh Darshan' aser 'Prashad' scheme tem kübok northeastern state nem senotsü agütsüogo. Swadesh Darshan scheme kübok Northeast nung project 16 agizüka kar renemogo aser kar terenemer lir, ta pai ashi aser State sorkar dang 'Azadi Ka Amrit Mahotsava' ya tejangraba tulu nung benjongtsü ajungshia liasü.

"International Tourism Marts ya linük nung North East Region atema 'travel and tour' tesendaktep sentong tulutiba lir, ta Union Tourism Secretary,

Singh-i ashi.

North Eastern India nung alima tebour tajung aser süngtong-litong aser naro talubosa aliba ya tourism renloktsü atema asadangtsü makokba rongsen lir, ta pai ashi.

Tourist tem anenzüksü tesem, chiyongtsü, shishilempadak aser südok-sünemba tsütsü kanga junga renloka otar, ta pai ashi.

India rongsenketzüng ainba nung tourism sector ya tongtipang ka kumogo, ta ashi.

Iba sentong nung High Commissioner, Brunei, Darussalam; High Commissioner, Malaysia; Ambassador Extra Ordinary, Republic of the Union of Myanmar; Ambassador, The Socialist Republic of Vietnam aser ano tongtipang nisungtem aser diplomats tem dena liasü.

Iba sentong nung state sorkar balalai tourism dak sendakba nung presentation agütsütsü aser shilem agiba state temi tourism product tem sayutsü. Ajidang masü, North East Region nung tourism dak sendakba nung sensaksem alitsü.

Iba sentong nung shilem agirtemi Kisama Heritage Village, Kisama War Museum aser Morungs, Khonoma Village aser Kohima World War II War Cemetery semdangtsü atema Ministry ajanga sentong ayongzükba liasü.

International Tourism Mart ya North Eastern State tem nung melentepa ayongzük aser Nagaland nung tang mezüngbuba alitsü. Taoba mapang iba sentong ya Guwahati (Assam), Tawang (Arunachal Pradesh), Shillong (Meghalaya), Gangtok (Sikkim), Agartala (Tripura), aser Imphal (Manipur) nung ayongzükba liasü.

NDMSA pur 3 buba Biennial Conference kaogo

Dimapur, Yimpoksüi/Nov. 28 (TYO): Nagaland Directorate Ministerial Service Association (NDMSA) pur 3 buba Biennial Conference cum General meeting sentong November 27, 2021 nü Capital Convention Centre, Kohima nung agia liasü.

NDMSA tir David Jemu-i iba sentong nung tir o jembiba mapang ajak dang tali jeret-pereta aser nendaka mapa inyaksü ajungshia liasü.

Ministerial ketsdangsurtem ya department indang tongtoret aser tongshi lir, aser ministerial staff medeni office shidak melitetsü, anungji züngsem ajaki mapa nung temolung agütsütsüla aser yimya tajung nung mapa inyaka nüburtem nem tatishitsü tajung sayutsüla, ta pai ashi.

Pai züngsem ajak dang association khuret angateta anitsü nenshia ashi aser tarutsü anogotem nunga iba tentet mesamai alitsü atema züngsem ajak shilem lir, ta ayongzükba liasü.

Sorkar indang ketsdangsurtem danga association ajanga mepishiba aser nungdakattem menua melie angadangtsü aser asadangtsü ajungshi aser taoba mapang mepishiba ama 'pay structure' aser 'promotional zone' reprangtsü shia liasü.

General Secy. NDMSA, Keheipeu Sephe ajanga report agütsüba mapang Association ya July 30, 1975 nung tenzük aser iba tentet nung züngsemtem ya Nagaland nung aliba Directorate balala 62 nungi LDAs, UDAs, Asst. Superintendents, Superintendents aser Registrar ajak sentep züngsem 1480 shi lir, ta ashi. Tang UDA post 470 aser LDA post 681 alitsü.

2020 küm February 20 nü tang aliba executive senden mezüngbuba alidang Administrative Officer (AO) post, priority nung promotion atema küm ajemtsü amala ken o mapang talangka nungi mebantenteti aliba maneni jembitsü lemtet, ta ashi.

Item ken o ya cabinet cell

nung magizük aser iba atema association-i aiben ketsdangsurtem ajurua jembishinür tekeratiba nung telangzüba tajung angashitsü imla atar, ta pai ashi.

Association pur March 10, 2021 nü senden mena deputation nung danga department nung non-ministerial staff ajanga registrar post agiba dak sendakba ken o jembia liasü aser iba mapang executive ajanga service Rules of 2006 nung aliba ama inyaksü langzü, kechiaser iba ama ya inyakba ajanga promotional zone nung timtem ajurutsü, ta ashi.

Iba dak sendakba nung tesüsa osang aruba ya November 1, 2021 nü liasü, ta pai report nung ashi.

Advisor, NDMSA, Botovi Sema ajanga report tatsüka agütsüba mapang, Association ya yakta Golden Jubilee amungtsü saka takok anguba mesüra tajangzük mapa inyakba yata mali, ta ashi.

Anungji züngsem ajunga dang nüburtem aser tarutsü putu asoshi pei department nung züngzünga inyaksüla, ta ajungshia liasü.

Sorkar nem takhangba agüja aliba nung takok angutsü asoshi pai züngsemtem dang ketsdangpur kisüng dak metaloka melie kasa khuret bena lungjemer inyaksü ayongzükba liasü.

2021-2023 kümsük atema mendenpur tasen shima liasü, aser parnokji I. Lanusanen Jamir, Superintendent, PHQ ya tir aser Sendang Cho, UDA, Labour Commission ya tatong tir alitsü. Iba sentong nung vice president, NDMSA, Vilavotuo Vincent Sote menden liasü aser Supong Meren, Department of Taxes ajanga Dimapur Unit, NDMSA tenüng nung report agütsü.

Treasurer report ya Treasurer, NDMSA, Abel Tsopoe-i agütsü aser Keheipeu Sephe, General Secy, NDMSA ajanga melepzüing o jembia liasü.

Chumoukedima Ao lanur telongjem tentet



Chumoukedima nung Ao Lanur Telongjem nung lenirtem kar yangi noksa nung angur.

Kohima, November 28(TYO): Dimapur district kübok Dimapur Ao Lanur Telongjem tentetba sülen tesem tesem nung Ao lanurtem telongjem tenteta odagi aser November 27, 2021 nü Chumoukedima nunga Ao Lanur Telongjem tentetogo.

Iba sentong nung tajungshi o Padma Bhushan Wb.Dr SCJamir, Wb.Toshitsüngba Aier IPS(Rtd),

CALT advisor Wb. Jemti Ao aser CALT kimen Wb.I.Nüngsang Jamir nungertemi jembia liasü.

Chumoukedima Ao Lanur Telongjem nung tongti ketsdangpurtemji tir Wb.K.Wati Imchen, tadong tir Wb.Tiasunep Walling, tongti zülur Wb.Imtiyong Longkumer aser repsem zülur Wb.Moazülü Imsong nungertem asütsü shimtetogo.

Chumoukedima nung Ao lanurtem telongjem tenzükba sentong nung ya Chumoukedima Ao Senso Telongjem, Dimapur Ao Lanur Telongjem aser Ao Youth Forum Diphupar teloktem nungia shilem agia liasü aser Chumoukedima Ao Baptist Arogo nung sannüker Dr.Imtisangbai lanurtem asoshi temoatsü aser teyari meshia sarasademtsü.

Trailblazer Society ajanga kaket ka sayaogo



Dimapur, Yimpoksüi/Nov. 28 (TYO): Trailblazer Society ajanga Hotel Saramati, Dimapur nung November 27, 2021 nü "Changki Ayu Küba ABC 123 Kaket" kaket saya liasü.

Iba kaket ya Dimapur Changki Union, Changki Mothers' Fellowship, lanur aser kaketsü tentet matsüngdang Dimapur Ao Baptist Arogo,

Signal Fellowship nung associate pastor, Imtiakum-i sayatsü.

Asen tetsü oshi sama aoba jenjang ka nung lir, kechiaser lanurtemi danga oshitem ang jembir. Trailblazer Society yagi oshi-oben wazüka ayuba kisüng masü saka asen sobaliba, kibong aser kin renloktsü aser aintsü atema inyaker, ta sangdong ka ajanga ashi.

DC Kohima ajanga HoDs dang cards/car pass meshitsü ashi

Dimapur, Yimpoksüi/Nov. 28 (TYO): Deputy Commissioner Kohima, Gregory Thejawelie NCS ajanga sangdong ka nung HoDs ajak dang 59 buba Statehood Day benjongmung atema

invitation cards/car pass tem Office of the Deputy Commissioner Kohima indang Establishment Branch nungi November 29, 2021 nü nungi tenzükba office lapokba mapang arua meshitsü metetdaksü.

Taoba ketdangsür aser kaketzülur Lalthlamuong süogo



Lalthlamuong (alias L. Keivom) (File photo)

Aizawl, November 28, 2021 (Agencies): Taoba mapang Indian diplomat aser Mizoram nunger nungtugu writer aser ken mejemer Lalthlamuong (alias L. Keivom) mapang talangka shirangba sülen, Deobarnü Delhi mozüki ka nung süogo. Pa arishi küm 82 liasü.

Asür Lalthlamuong'er adianutemi sangdong ka nung, taoba diplomat Lalthlamuong ya taküm June ita nungi timtem balala agi shiranga liasü.

Tatsüka dang lir pa dak cancer putet aser iba mapang nungi pa yipden nungi mesaktetti shiranga aru.

Deobar anepongi 5:46 ako meta Delhi kübok Max Super Speciality Hospital nung pa tango sashiba anenadok, ta kasa sangdong nung shia lir.

Lalthlamuong-i chirnur pezü toktsür süogo. Par pezüprongla bendanglen alir.

Keivom, shiba nem 'Zoram Khawvel Pa' nungja agütsü, pa ya 1939 küm Manipur indang Churachandpur district (tang Pherzawl district ajar) kübok Pherzawl yimtsüing nung aso.

'Zoram Khawvel' (a voluminous book) kaketzülur sülen aser 'Zo hnathlak' (Chin-Kuki-Mizo-Zomi telok nungi jakzükertem) nung pai shilem tulu agiba atema pa nem 'Zoram Khawvel Pa' nungja agüja liasü.

Lalthlamuong ya Hmar kin

Academy of Letters ajanga iba award agütsü.

Kaket zülua aser ken mejemba dak alia, literacy maparen aser Zo longjemtsü asoshi shilem tulu agiba atema pai award aika nguogo.

Lalthlamuong-i züluba kaketzülur 'Zoram Khawvel-4' ya Hitler indang 'Mein Kampf' kaketzülur den medemdang, kechiyong iba kaketzülur (Zoram Khawvel-4) ajanga Zo meimba aser longjemba indang jembir.

Paisa Temeshi Laishiba aser Rabindranath Tagore indang Nobel Prize takok anguba kaketzülur - 'Gitanjali' anaprongla Hmar oshi nung meyipzüki.

2009 küm pai Zoramkhawvel.com website lapoktsü, koba Mizo e-book mezüing asütsü aser alima tesem balala nung alir Zo kintemi online ajanga pai züluba kaketzülur züingtettsü asoshi iba website lapok.

College azüingba mapang, Keivom ya kaketzülur lennir ka liasü aser pai Hmar Students' Association (HSA) indang emblem (logo) yanglutsü (design). Zo kin rongnung HSA ya kaketzülur tentet mezüingbuba asütsü, koba 1939 küm tentet.

Lalthlamuong (Keivom) asüba osang angashia Mizoram indang kaketzülur tentet Mizo Zirlai Pawl (MZP), Hmar Literature Society (HLS) aser HSA densema Zo tentet balalai asür adianu aser kinunger tem den mangyim jashi lemsatepogo.

HSA-i Hombar anogo nungi tenzüka anogo tentet tashi asür Lalthlamuong mangyimtsü asoshi sangdongogo.

Deobarnü HSA-i sangdong ka ajanga, asür Lalthlamuong nem akhüm aser tetushi agütsütsü asoshi November 29 nungi December 05, 2021 tashi Churachandpur kübok general headquarters campus nung HSA wako tom tashi atsüketer ayutsü, ta metetdaksü.

nungi lir, koba Chin-Kuki-Mizo-Zomi group indang kin tongti ka asütsü.

1963 küm DM College, Imphal nungi pa graduate asü aser 1966 küm Gauhati University nung pai master degree (History) renem.

Küm ka lir, 1967 nung pai Indian Revenue Service (Customs & Excise) nung aden. Iba sülen, 1970 nung pai Indian Foreign Service (IFS) nung aden aser küm 32 tashi Indian diplomat ka ama inyakba mapang, Italy aser New Zealand densema bendanglen linük trok tashi nung pai inyaka liasü.

2002 küm Lalthlamuong mapa nungi anen.

Mapa nungi anener sülena Keivom (Lalthlamuong)-i anisüingzüka makazüi pai jangraba literature aser music tsütsü inyak, koba 'Zo kintem' longjemtsü asoshi iba ya shilem tuluka asütsü ta pai bilema liasü. Ibaji ajanga pai Zo kintem aliba tesem balala semdang.

Arishi küm 82 tashi liyonga aruba mapang, Keivom-i Hmar, Mizo aser English oshi nung kaketzülur 22 tashi zülua adokogo aser Hmar kin indang (pei lima meimba) ken densema pai ken 150 dak tema mejemogo.

Pai züluba kaketzülur - 'Zoram Khawvel' (8 volumes) ajanga 1991 küm Book of the Year naroküm angu, koba Mizo

Tripura civic body election nung BJP-i takok tulu angu

Guwahati, November 28, 2021 (Agencies): Deobarnü BJP-i Tripura nung Agartala Municipal Corporation (AMC) aser municipal body 13 nung takok tulu nguogo.

BJP-i civic body 11 nung takok angu ta osang angazüker. Itemji Khowai (8 seats), Kumurghat (15 seats), Amarapur (13 seats), Dharmanagar (24 seats), Teliamura (15 seats), Jirania (11 seats), Melaghar (13 seats), Sonamura (13 seats), Belonia (17 seats), Sabroom (9 seats) aser AMC (51 seats) lir.

Ambassa urban body nung Trinamool Congress, Communist Party of India (Marxist) aser Pradyot

Kishore-i aniba TIPRA Motha teloktemi menden kaka nung takok angu.

Tanüingba menden 12 nung BJP-i takok angu. Panisagar aser Kailashahar nunga CPI (M)-i menden kaka nung takok angu.

BJP-i menden 112 nung tetokteper shinga meleii takok nguteta liasü.

Wards 222 nung candidate 785-i nomination papers agütsü. BJP-i menden 217 nung takok angu aser CPI (M)-i menden 3 aser TMC o TIPRA Motha nati menden kaka nung takok angu.

Tan municipal elections nung BJP-i menden 334 nungi 329 nung takok angu.

GIPS Guwahati nung Cell Culture Laboratory lapokogo



GIPS Guwahati nung Cell Culture Laboratory lapoktsüba noksa nung angur.

Guwahati, November 28, 2021 (Agencies): Academics aser research development maparen tsütsü mera tasen ka agia, Girijananda Chowdhury Institute of Pharmaceutical Science (GIPS) Guwahati nung tangar teyari magii (self-financed) Cell Culture Laboratory ka lapokogo.

Iba Cell Culture Laboratory nung Institutional Biosafety Committee (IBC) ka lir, koba November 25, 2021 nü DBT, Govt of India ajanga agizüka liasü.

Guwahati tesem ajanga nung Girijananda Chowdhury Institute of Pharmaceutical Science ajanga inyakba maparen ya mezüing asütsü.

Tongtibang nisung matsüingdang, Prof. Pratap Jyoti Handique, Vice-Chancellor of Gauhati University aser Vice-

Chancellor (in-charge) of Assam Science & Technology University (ASTU) nati iba laboratory lapokja liasü.

Prof. Gouranga Das, Principal, GIPS Guwahati-i tejaokertem pelashishia agizüki aser iba institute nung laboratory nungdakba indang telok dang metetdaksü.

Research tsütsü bendanga agütsür inyakba atema Prof. Handique-i iba institute nem tenüingsang agütsü aser pai, iba lab timi amshitsü atema merükmejuba inyakyim nung anidaksü tetuyuba agütsüogo.

Iba BSL 2 level lab ya sorkar tentet balala ajanga teyari agütsür teinyakdak aliba research project balala kübok 'mammalian cell line-based research on cancer drug delivery' maparen nung amshitsü.

Karimganj nung crore 13 alang mozü apu



Guwahati, November 28, 2021 (Agencies): Assam police aser Border Security Force (BSF) longjemer mita aoba mapang, sen cr. 13 alang Yaba tablets apu.

Honibar nikongdang Assam police aser BSF longjemer telok kati Nelaam Bazar yimtsüing kübok Purba Balia tesem mita aoba mapang Yaba tablet lakh 2.59 nguteta liasü.

BSF sangdong ka ajanga angazükba agi, shishilembadak item mozü jenjang cr. 12.96 shi

asütsü ta asadanteter.

"Karimganj kübok Purba Balia, Neelam Bazar nung temesepba mozü yua aliba osang tejangja ka BSF ajanga angazükba sülen, BSF (Mizoram aser Cachar) den Assam Police longjemer mita ao aser sen cr. 12.96 alang Yaba tablet lakh 2.59 shi ngutet," ta BSF sangdong ajanga metetdaksü.

Iba maparen dak sendakba nung nisung ka puogo, ta parnokisa ashi.

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

NO. NO.DTE/ESTT-NP-13/2017

Dated, Kohima the, 27th Nov, 2021

CORRIGENDUM

In supersession of this Department's Notification NO. NO.DTE/ESTT-NP-13/2017 dated 26th Nov, 2021, the 3(three) Multi Tasking Staff (MTS) Posts against the newly established Government Polytechnic at Peren, DoyangWokha and Aboi, Mon mentioned at Serial no.17, shall be filled up by the candidates of indigenous inhabitants of the respective District as per P&AR Office Memorandum No.AR-3/GEN-174/2007 (Pt), Dated, 26th October 2017, and not as indicated in the earlier advertisement dated 27th Nov, 2021.

Further, the eligibility criteria for the post of Lecturer in Electronics & Electrical stated at Serial no.8, shall be BE/B.Tech in Electronics & Electrical Engg/Electrical & Electronics Engg.

(Er. M. Nakro)

Additional Director & HoD.



TIR YIMYIM YIMOBILEM (EDITORIAL)

DIMAPUR SANGTENNÜ, YIMPOKSÜ (NOVEMBER) 29, 2021

Election merüka agidi

Tanü asen lima nung asenoki kanga aginüa yongyaba mapang kaji election merüka agiba anogo ajurunüba ya asütsü. Ibai menatepa aoba tashidak tulu agi küm aika kangshia aliba tia nungi anepnüa anogo tajung ajurutsü yongyaba mesüka lir. Joko, küm aika election merüka magiteti aruba ajanga Nagaland nung terenlok mapatem junga meinyakteti nübortem maparen ajak nung takoksa ngudagi aser election nung tokteper aika timtem tiai iogo. Election agiba ya yimsüsür tajung shimteta nübortem rongsenren nung takarba kuma pei lima renloka aotsü atema agir, saka asen lima nungbo election ka agili, takar ishika sensaker kümli, ano election ka agili sentsüsür teimba kümli ta, Nagaland nung, talisa asenok Aor, takar aika sensaker kümogo. Ibayongji, sentsüsürtemi Nagaland government bener aoer. Tanü Nagaland state takar mekümteti election ka agili tesensakba aser election ka agili sentsü teimba kümli ta, oda odabo, inyakertem nema ita sen magütsütetsüsa akümba tebilemtü ajak ya election shitak merüka magitetba nung jagi tenzüker. Nagaland nung election merüka magitetba tetezü tashiyim agi akoktsü meranger, sen agi vote ayoker, anungji sen agi vote alir. Nagaland nungbo political party tenteta akaba ya tenüng dang, kechiyong party tangatetba aser nükjidong nung yimten nung shilem agir masü saka yimertemi pei yimer senso candidate shimtsü aser party sülen masü sen sülen aotsü. Iba jagi, political party nükjidong aser lenisüba ajungba agi masü saka tembang kata asüyonga ozü yimer dang süra ojang ta asüba tangatetba nung asenoki candidate shimer. Iba jagi asenoki meteta asenok yimten nung aser rongsenren jenjang nung talangka luadokogo. Tangarbo yimsüsür asütsü asoshi ngüpti ngüplong asüyonga tarak maket, temetong, aküm taket shima agir, saka asenokbo tembang asüyonga ozü yimer süra ojang ta bilemer. Anungji, asenok tangatetbaji asen yim among adena maor. Tangar o asenok na tetsüngdaji aji lir. Ibayongji asenoki tangar memeneper, kecha tesüngmangtsü mali. Ano, tejashitsü aser kangasa tamashi madak tamashi mapa kaji, asenoki asen yimer senso candidate asütsü shimba to asenok tangatetba tajung agi shimer masü saka sen agi alizükdaktsür amai asenok vote ajak pa dang ayoker. Iba jagi asenok yimkongi shimba candidate-sang tobo, election nung adokyonga, pa akaba ajak yoktema yoker külena sentsü maotet nisung tsüngdang jenshia senzüsüsa akümer. Asenok ajak longjemer temelenshi tajung bener arutetsüsa asen senso agi yimsüsür tajung kuma yimsüsüdaktsü melen, akümüli piyong sentsüsür kuma aotsüsa, Clean election yimyim menüja senso candidate shimertemji asenok lir. Asenoki shim aser asenoki yari saka asenoki shimsang yimsüsürsangbo talidaka maka sentsüsür aküm süra, asenoki paji komaka shim aser komaka yari (?) ta bilemdangtsüba mapangji tang lir. Asenoki election nung shimba nisung ya yimsü sädaktsüsü shimer asü mesüra meshimetsür kuma odaktsüsü shimer ? Asenok senso ajak mungdanga lemtetba telemtetba to, asen yimer takar aser tular kar kangshia sentsüsür kümdaktsüsü asoshi lemtet asü, koda (?) ta bilemdangtsübaji asenok ajak atema kanga tongtibang kümogo. Asenoki election mapang nung, takok ngunü dang, tashiyim agi mapa tamajung inyaka teraksa aser takoksa paikato bener arutsüba to langa, election sülen aseni shimtetba nisungi ken o tajung jemba inyakba angur asü ? Election mapang sen, süng, long, injang aser bomb ajak amshia raratepa takok tokteptsü. Ki shibangtsüsü, pua bener aotsü aser senso nungi jentoktsü aser election sülen lenmang maka, tzü agi anüngba aser light aruba timtem marem asateptsü. Asenokbo asenok ajak sentsüsür maküm tashi aser takaba ajak tangar dang meyoktem tashi, Clean election yimyim menüja dang yamai aotsü na ? Clean election yimyim sülen manidaktetra ABAM-i pur merenshitsüla , Arogo nung endoktsüla, ABAM-isa okadak ken o benoktsüla ta bilema, ano taruba election nunga shibaiang sen teimba agütsüsü (?) ta bilemer asü, koda ? Clean election ya Clean election yimyim ayimertemi inyaksüba masü saka asenok senso shiai peisasa mulungteter inyaksüba mapa lir. Clean election yimyim ayima jajartemi ozüng amshia polling station tashi arur nüka lia election magitettsü. Ozüng agi malenyonga aser shingiaa temerenshi magütsüyonga asen alidak kima yimdong menentsüsa asenoki janaona meindoker aser metsümeshi masür, kechiyong asen lima merüka yunüba tangatetba shisatsü asenok dak lir. Iba kasa merüka yunüba tangatetba aser shisatsü election merüka agitsüba maparen nunga nungdaker. Kodang asenok dak iba tangatetba shisatsü pokteta adoka, asenoksasa asenoki election nung sen aser tashiyim mamshi, pei mulungba nung tetsübu melii shilem agitetdir, iba anogoji asen lima yimsoshi tenzüka anogo asütsü. Iba anogoji ajurutsü yongyar.

OLEMSABANG

Tanü lokti temelenshi bener aruba nung pei-
lokti jenjang reprangdangba
(*Introspection in bringing about a social change today*)

S. Temjen Imchen, Jorhat, Assam

(*Yashi adok nungi...*)

i. Sayutsungiba ama mapa kuma inyakba (practicing what we preach)

Asenok tamangertemi laishiba nung sayutsungiba den külemi mapa kuma inyaksübaindang tesayuba jungjunga shia angur. Osangtajung Mathi 23:1-12 nungji Yisui tezülurtem aser Farisitem aitsüba shia angur. Yihuda nunger lenirtem jagi Mosa ozüng nung kechi shia ali item ajakji kanga junga metet, saka mapa maka! Idangji, Yisui parnok aitsu "kechiaser parnoki jembir, saka meinyaker" (v.3). Tanua kesaji Naga lima nung arogo aser lokti kari langpang nungibo kotaki tangsa ayipa atutsu amai sayutsungir! Ajida asüyonga, mapa mekara tamang kisungji tasü den saku (Yakob 2:14-26). Sura, itemji anemsübapurtem asütsü. Khrista sülen anidaker asoshi ya tongtipang - Mathi kaket nung zulua aliba ama Yisu ji asen tatishitsü kümdaktsür Pa sülen anitakdi. Asenoki jembibba aser inyakba jagi asen tamang jagi sayutetsüla.

ii. Ner lokti nung angati agütsüba (volunteer in your community)

Arogo aser lokti nung shisatokden akaba aser telemtetba tajung agiba metsüji aser jakdang tenuk kuli lir. Asen Dimapur yimtiba nunger alir Aortemi temeim mapa aiben inyakba ngua arudagi. Iba nungji, asen Nagaland state nung lokti aser arogo balalai - talisa Dimapur Area Ao Baptist Churches (DAABC) aser Civil Societies (CSs) ajanga covid wara tongpang koktetsü mechinung tenla sen, chiyungtsu teperi renemer frontline workers tem nem Dimapur yimtiba tesem balala nung lockdown 02 mapang nung inyakdagi. Tesüba küm lockdown 01 nunga item lokti yagi kanga junga teyari mapa inyakogo. Iba la temeim aser teyari mapa Arogo mission board ajanga inyakba dangji langpang nungi sayutsungiba ji mapa kuma inyakba' rongnung ka lir ta shiteter

Angati oagi mulungsoa nungdakbapur nem teyari agütsübaji Yisui sayuba nung mapa kuma inyakba mapa ka asütsü. Ibjaja kotak lenmang!

iii. Menürem jakden!

Menüremba jakden (smiling face!) ya meimchir yimya tajung rongnung ka lir! Iba ya nai mashi mapang ka nung inyaktet, idangji tangar dang meteti temeim mapa sayutetba atar. Na aliba anasener kiyonger dang, kiji-kina nung timtimba pur, covid-19 wara i shiranger ka, shirang tapu kati shirangbapur, matamapensar, mesüra makamaitba pur dang teyarisa magutsuteta kasa, oda nai parnok sui-supong dang kodang parnok ajurudir menurema jembibajia tuluka! Nisung ka kodang pela-a lidir idangji la/pa anema alitsü (ta research ka ajanga ashir)!

iv. Sarasadem tashi

Lokti nung temelenshi bener aruba nung na aser kü tamang sarasadem aser rongsen agi yaritet. Meimchir telok aser lokti nung kodangsa timtim-toushi - tat.agi, covid-19 wara, ajurudir asenoki mezungbuba nung timtimba pur asoshi asen Khristan tamang agi sarasademtsur! Anitet 32: 11-14 nung asenoki Mosai sarasademba angur. Israel kin madak mezungpur Tsungrem ainakar aser putir Tsungremer mulungjanga melenshitsüsa sarasadem asu aser Mosai mepiba Tsungremi anga. Yihusua-ia pa sarasademba nung, anu meludaktsui noktakang ni ta sarasadem (Yih.10:12-13). Tetsur ka tamang indang ano lai-o nung shia angur. Hannah-i tanur ka meshia Tsungrem dang mepi aser angu (I Sam. 27), maneni lai-o nung tatishitsu anosa zülua angutsü.

v. Rongsen teyari

Sarasadem den külemi, ano tamang tenla rongsen ajanga na aser ni agütsüsü tanü pesaprongba tensa nung lenmang jenti nung angur. Sorkar-i madoksa inyakra mesüra ochimeshia inyaka nebur nem sen aser rongsen agi Govt aganecy ajanga meinyakra, idangji asen lokti nung taka-taiteri rongsen agi sensaker, alaashia alirtem shirangbapur aser parnok kibongtem yaritet. Ne rongsen tenla ji Re. 1-Rs.10, Rs.100-Rs.1000, mesüra lakh menden nung aser timba-a agütsüsü akok. Iba tenla sen amount ji kwi südir süang iba jagi, shiranger ka mesüra timtibapur ka yaritet. Ibjaja Tsungremer tenyaba mapa inyaker ka asutsu.

O-tempang:

Lokti nung temelenshi ka bener arutsü atema kija, kibong aser lokti balala aser arogotemi temeim aser teyari mapa inyakba ajanga adoker. Tanü covid-01 aser covid-02 wara ajanga alima nung alir ajak dangi timtim-toushi aser tasuba jenti bener arutsuogo. Iba wara ya alima Tongpang tasembuba (world war III) amai lir! Ibjaji shitak, kechiyong iba wara tesashi yagi alima rangpen nung kija, kibong, sorkar, aser lokti ajak menüpadok, ibayongji meimchiri taneptsü bushiteper! Iba pesaprong tensa aser mapang nungji iba wara tesashiji tetsübu-dang metsübui, meimchir lokti ajanga nung teyimlatep, telongjem aser temeim mapa agi inyaksüla aser ibaji dang lenmang. Iba lenmang ngutetsu atema, sorkar den yaritepa ano social media sabang balala lokti nung sabang kwinaka lir, aser Khristar arogo ajanga lenmangji sayudagi. Ibjaji asenok ajak asoshi tepelatsu osang! Anosa, item teyari aser temeim sayuba mapatem ajanga asenoki asen lokti nung taneptsü aser temelenshi ka bener arutet!

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chedema Peace Camp nung asentenshi sentong tembangogo



Kohima, November 28 (TYO): November 25 nungi tenzüka November 28 tashi Chedema Peace Camp, Kohima nung "Linük asentenshijang" (T.Ken 2:8) omen nung ajemdaker linük asentenshi sentong agiogo, ta Crusade Secretary, Rev. Vikuo Rhi-i metetdaksü.

Iba sentong nung o jembirtemji (1) Rev. Dr. N. Paphino, Vice President, Nagaland Joint Christian Forum (NJCF) (2) Rev. Dr. Vezopa Tetseo, Sr. Pastor, Chakhesang Baptist Church Diphupar (3) Rev. Dr. Moses Murry, Treasurer, NJCF (4) Rev. Ahohe Sema, Sr. Pastor, Sumi NCRC Dimapur (5) Rev. Imcha Wati, NCRC Missionary At-large (6) Rev. Vikuo Rhi, Youth Secretary, NBCC (7) Ms. Visasieü Dolie, Women Secretary, NBCC aser (8) Rev. Thekrulezo Nagi, Supervisor,

Projects & Development, NBCC nunger liasü.

Logos College Dimapur nungi Neilhou leniba nung tetushi aser tekülem agi aser Gareiphema, Ura Village, Chedema aser SRM Task Force nungi Choirs aser telok balalai ken aten.

Tekülem aser counseling agirtemji (i) Pastor Neingurazo Nagi (ii) Rev. Kevimese Suohu (iii) Dr. Yato Whiso (iv) Pastor Kezha Dzüvichü (v) Pastor Yhunselo Kent (vi) Lahie Krose aser (vii) Medovino Phizo nunger liasü aser Prayer Teams ji prayer centres pongu-Kipfüzho CRC, Naga Shisha Hoho, Chokriba Naga National Prayer House, Yorüba Prayer House aser Nagaland for Christ Seithekie Basa liasü.

"Linük Asentenshijang" omen nung ajemdaker o jembirtem ajaki linük asentenshitsu atema tanela

temeshi ajanga pei tama asentenshitsu, ta ashi.

Pei menen nungi tama meyiptsüla, temenen tatok meshitsu, tangar dang tai atoktsüla, Tsüngrem tsüngdang ajemalutsüla aser pei kibong asentenshiba sülen ang Arogo aser kibong asentenshitsu, ta o jembirtemi lemsatapa liasü.

Iba crusade ya SRM Convenor, Akho Meru leniba nung Self Reliance Mission (SRM)-i ayongzüka liasü aser anogo pezünü sentong ya Rev. Thekrulezo Nagi (Crusade Director) aser Diethosielie Zhasa (Assistant Director) na leniba nung agi.

Organizing committee tenüng nung Crusade Secretary, Rev. Vikuo Rhi-i o jembirtem aser sentong nung shilem agir ajak dang pelaba lemsatapa liasü; talisa iba crusade nung adenertem ajak dang pelaba pai lemsatap.

Sri Lanka nung Tenla ki asem amakba ken o angadang tenzükogo

Colombo, November 28 (Agencies): 2019 küm Easter Sunday anogo nung kiralongrartemi bomb amshia Tenla kitem amakba ken o dak sendakba nung tai tonglokja alir nisung 21 anema Sri Lanka High Court-i ken o bushisüngdang tenzükogo.

Tenla ki amakba ken o nung tang tai tonglokja alirtemjibo tilateri aibelenertem dang lir, anungji Tenla ki amaktsü asalentong yanglur tongti aibelenertem aputsüla, ta Khristan lenir kati sorkar nem takhangba agütsü.

Colombo nung tongti putir, Malcolm Ranjith-i, bomb amshia Tenla kitem aser hotels amakba asalentong yanglur tongti aibelenertemji aputsüla, ta takhangba agütsü.

November 23 nü osangbener den jembidang pai, "Iba ken o metembang tashi Khristantem ajak longjemer nokdaksü ni mepishir," ta metetdaksü.

2019 küm Easter Sunday nü kiralongrartemi bomb aika

amshia amakba mapang nung nisung 269 asü aser nisung 500 dak tema yirua liasü.

Islamist kiralongrar telok-National Thowheed Jamath-i Tenla ki asem aser hotel pezü amak. Iba ken o bushisüngdangba sülen police-i asalentong yanglua amakba atema nisung 21 anema ken o 23,000 dak tema benokogo aser November 24 nungi high court-i tai tonglokja alir 21 anema ken o angadang tenzükogo.

Iba lendong ken o ya Presidential commission-i bushisüngdangba sülen mangatetep tulu adoka liasü aser tesüsa iba ken o dak sendakba nung nisung 21 nem tai tongloktsü.

"Iba temenen mapa ya shibai inyak? Parnoki kechiba inyak? Ochi temeden mangu tashi onoki nokdaksü," ta Ranjith-i metetdaksü.

2019 küm November ita nung linük Tir election nung Gotabaya Rajapaksa-i Maithripala Sirisena madak takok ngua Tir aküm. Election

atema nüboyimba mapang nung Rajapaksa-i Easter anogo nung kiralongrartemi amakbaji security tashi maitba ajanga liasü, ta shia Sirisena nem tai tongloktsü aser asürtem nem ochi temeden agütsütsü, ta nangzüka liasü.

Tangbo Khristan lenirtemi Rajapaksa-i aniba sorkar danga mepelar.

Iba ken o angadang tenzükba anogo nung Ranjith-i, "Iba tatalokba nung miima asalentong yangluba jungkai madoker ta onoki bilemer," ta metetdaksü.

"Onoki shinga anema mangyangtsü bilema mali saka Arogoi ochiji metettsü nungdak. Amaktsü sentong meteta alirtem aser temaba menden angutsü nangzükertemi tangbo kecha memetet ama sayur," ta paisa metetdaksü.

November 24 nü Sri Lanka Tir, Rajapaksa-i, Easter anogo nung kiralongra tatalokba ya taoba sorkar tashimait ajanga lir, ta metetdakja liasü.

ANO GO ABEN TSÜNGREM DEN

Shisatebulu, tenüng sangang

Kecha nung temulung tatema saka ajak nung sarasademba aser temepishiba aser tenüngsang agi nenoki mepishiba Tsüngrem metetdakjang. Filipi 4:6.

Mathi 6 nung Yisui tenem nung sayutsüngiba mapang nübur dang shisamebulutsü ashi. Kechi achitsü mesüra kechi abentsü shisa tebulu. Nenok taküm asoshi shisa tebulu. Asüng asoshi shisa tebulu. Idangji Yisui ashi, parnok kotaker Tebui parnok nungdak ajak agütsütsü ta ashi. Pauli ibai tatsü kuma tejangja ratetta ashi. Kecha nung temulung makai teli! Ne mapa asoshi shisa tebulu; ne temang asoshi shisa tebulu; rongsen atema shisa tebulu. Kechiba? Shisabuluji temenen ka lir aser ibai amangba den mesüktepa lir. Kodang shisabuludir iba jagi Tsüngrem dak tamang makaba sayur. Tsüngremi alushijak anebalur aser arem naro nem abendaktsür süra shirnoki Pa meimer parnok nem sempet tajung magütsütsü ma? (Mathi 7:11).

Shisabolui ne temang raksatsür, ne tebilembatem chimatsür, tangar den libaliro nung timtemdaktsütsü aser ne tamang ilaa kümdaktsütsü. Anungji Pauli iba nung ne taküm koda alitsü maneni ashir. Kodang ne dangi shisabulu arudir aji metettang, anenang aser sarasademang. Na shisamebulur saka iba tia nung nai Tsüngrem dak amanger ta Pa nem metetdakjang. Ne nungdak Pa dang shiang aser tenüngsang agüjang. Pai tabensa sempet tajung agüja kar. Pai ne nem par jabaso agütsü aser ne shisabulu toktsüdüng Pai ne nem masadangtetba tesünep agütsütsü (t.7).

Tsüngrem, ni iba mazüangi aliba taküm ajanga jajadang, anogo shia Ne dak amangtsü yariang kechiaser Nai ajak azüoker.

Plateau State nung Fulani teloki Khristan 10 tepset

November 28, 2021: shi yim amak aser asürtem November 26, 2021 anepdang rongnung nisung trokbo kibong züngia 1:00 ako meta Nigeria ka nungi dang liasü, ta nung Plateau state kübok metetdaksü.

Ta'agbe yimdak Fulani teloki Khristan ter tepset aser ki 100 arrshi küm 80, Gara Ku, Wiye dak tema rongdoktsüogo, ta Gara (67), Tala Gara (68), International Christian Concern Rikwe Bala Yoh (65), Tabitha (ICC)-i metetdaksü. Danlami (8), Sibi Danlami (4), Friday Musa (35), Daniel Mandi (45), Mweri Chogo (86) aser Ayo Balai (6) nunger lir ta jangjaogo aser iba lendong nung mejungi yirurtem rongnung Musa Kwa (60), Sibi Gara (65) aser Nma Weyi (40) nunger densema lir.

ICC den jembidang Irigwe Youth Movement Tiri, iba area nung Khristantem samatsütsü nükjidong nung telungpurtemi amak, ta metetdaksü.

Miango district nung aliba hospital yipten nung mejanger ICC den jembidang Sibi Gara-i, "Khrista atema ozü semchirtem samaogo," ta ashi.

Ano iba lendong nungi jenbur kati, "Ni lenmang nung ang mejangtsüsa aküm. Iba lendong nungi ni tera agi dang jenbua liasü saka ozü kibong züngsem trokbo süogo. Yimdak nungi nisung 690 shi jenshiogo," ta metetdaksü.

Miango Youth Development Association nung otongdar, Nuhu Ngah-i sangdong ka ajanga, Fulani teloki ghonda ana

Miango district nung aliba hospital yipten nung mejanger ICC den jembidang Sibi Gara-i, "Ni Miango District nung tang agi ita trokbuba dang alir, ajisüaka Fulani teloki injang agi yirutsür nisung 40-50 shi ni yariogo, aser parnok timbaka Irigwe nunger Khristantem lir," ta metetdaksü.

"Yirur arurtemi hospital bill agütsütsü tasak saka Khristantem aser melungtet teloktemi bill agüja parnok yarir," ta paisa shisem.

Tawa kasa district nung ICC-i nisung ter atema hospital bill agüja liasü.

OLONG PAITEP # 6011

1			2		3		4		5	
6		7								
					8					
9				10						
						11				
			12							13
	14							15		
					16					
			17							
									18	
19										

TIPILEN	2. Teburtemi tejak nung awaba - (8)	LANGTSÜNGLEN	1. Temejangdak - (6)
	6. T _ _ _ em - (3)		3. Nisung ka mapa inyaksü nübo- (4)
	8. Tzük ayudak - (3)		4. Azüntsü asoshi mejemba - (6)
	9. Nüngdakba dang timba - (6)		5. Tesangwa agütsüba - (5)
	11. Züina ao - (4)		7. Tila masü - (4)
	12. Yangi tzü angur - (5)		10. Tebenjem tetsür chanu - (4)
	14. Tangar dang nungi tali - (4)		11. Tekolak nung inok - (4)
	16. Senyong masü - (6)		12. Tetsüngda - (6)
	17. Oadokdi - (3)		13. Tangar inyakba ka inyak - (6)
	18. Tzü tarok - (3)		14. Tim masü ta ashi - (5)
	19. Yimtaklir aikati iba ya ki den külemi yanglusemer - (8)		15. Asalendong - (4)
			16. Tanü dangtsü - (4)

OLONG PAITEP # 6010 TELANGZÜBA

TIPILEN :	1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.	LANGTSÜNGLEN :	1. Tenükjang, 2. Luden, 3. Kiochtsü, 5. Lenti, 7. Tajangzük, 11. Teronem, 12. Sempa, 13. Jahaz.
------------------	---	-----------------------	---

AROGO KA NUNG FATHERS' SCHOOL REFRESHER COURSE AGIR :

Pastor : Temeim tenzükertem, nenok deacontemi pei pei kiyong nung, taoba 2018 küm Fathers' school nung atener ajak dangi oagi Refresher course nung tentettsü metentettsü asüngdanga list yangluangma.

Deacon1 : Anük, Taruba hopta nungji Fathers' school pur to refresher course ka agitsü atema tentettsü pur tenüng zülua senzür ako ya, na koma, tentettsüa ma?

Alokba : Haeet oko, iba Fathers' school nung angazükba toa ano half kata meinyakmaji tanbo meteni lidi, ya hür esaab hadi no?

Lilir : WhatsApp

TANÜBO NAI LANGZÜANG

Q. Koba tesem nung Indo-France joint military exercise - "Ex-SHAKTI 2021" tenzük.

[A] Andaman & Nicobar Islands
 [B] Defence Institute Of Advanced Technology, Pune
 [C] Military School of Draguignan, France
 [D] Vishakhapatnam

(Taruba adok nung onoki langzüsü)

YASHI ADOK TELANGZÜBA : Afghanistan

AO OSHI ANGAZÜKDAK:
TANÜ ANGAZÜKTSÜBA OJANG

Lia
 (adj) tetsüngda talangka masü, apiga (short distance)
 * Kübui ni **lia** nungi aruya angu.

Lia
 (v) tesem ka nung monga aliba (live)
 * Ni otsülaer kidang **lia** school azüng.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA

- ALIMA NUNG APU (BRIDGE) TALANG KAR:**
1. The Danyang-Kunshan Grand Bridge, China - 164km
 2. Changhua-Kaohsiung Viaduct, Taiwan - 157km
 3. Cangde Grand Bridge, China - 116km
 4. Tianjin Grand Bridge, China - 113km
 5. Weinan Weihe Grand Bridge, China - 79km
 6. Bang Na Expressway, Thailand - 54km
 7. Beijing Grand Bridge, China - 48km
 8. Lake Pontchartrain Causeway, USA - 38km
 9. Wuhan Metro Bridge, China - 37km
 10. Manchac Swamp Bridge, USA - 36km

SUDOKU # 6052 TELANGZUBA # 6051

9		7				2	4	7	6	3	9	8	2	4	5	1	
2	4		7	5	9		1	5	2	9	1	7	4	3	8	6	
1		6	8	4	2	9		8	1	4	5	6	3	7	2	9	
	6		4		1	5		1	7	2	4	3	6	8	9	5	
			3	2	6		8	1	6	4	5	8	9	7	2	1	3
	1		5	9	7			9	3	8	2	5	1	6	4	7	
					4		3	2	9	7	3	1	8	5	6	4	
	8		1		5		4	4	5	6	7	2	9	1	3	8	
4					8	1	9	5	3	8	1	6	4	5	9	7	2

OJANG LUTEP # 5608

- SÜTEIBA :
- NGTMAPAEM :
- AKKOMA :
- JUNMAG :
- GJIYONA :
- UNTAJG :
- AKINY :
- NZÜKTETSÜ :
- UAMEN :
- LIMA :

OJANG LUTEP TELANGZÜBA # 5597

ATSÜAYONGA MASÜ SAKA TEMULUNG TEMERÜK
 AGI TSÜNGREM NEM TENLA AGÜJANG

TAN HOPTA ATEMA - KOMA SÜLA ?

Q. Kohima nung Hornbill benjong amongtsü atema Kisama yim akümba ama, Mokokchung district nunga yim ajunga adenshia sobaliba benjong amongdak yim tasen ka mesemtet nunga koma süla ?

Asükwa mongpu Parliament jakdang party ajak senden amen

Coronavirus agi asür kibongtem nem teyari agütsütsüla: Opposition



November 28, 2021 nü New Delhi nung Centre-i ayongzüka party ajak senden amendang tangokba noksa nung angur.

New Delhi, Yimpoksüi/ November 28 (Agencies): Hombar nungi tenzüka asükwa mongpu Parliament senden tenzüksü anogo ka dang lia Amongnü Centre sorkari party ajak senden ka ayongzüka menogo.

Party ajak senden nung opposition party aikati taruba Parliament nung Pegasus ken o, osettsüset/chiyungtsü nung jenjang kanga atuba aser mapa manguba tebilemstü onüktem nung o lemteptsü takhangba agütsü.

Iba senden ya Union Minister of Parliamentary Affairs, Pralhad Joshi-i ayongzüka liasü.

Senden nung o jembitsü atema maongka magütsüba agi AAP lenir, Sanjay Singh-i senden nungi ayazüka ao. Singh-i aluyimertem atema Minimum Support Prices indang ozüng ka yanglutsü takhangba agütsünüa liasü.

Party ajak senden nung Ato kilonser, Narendra Modi bo maden saka sorkar tenüng nung Defence Minister, Rajnath Singh aser Commerce Minister, Piyush Goyal na aden.

Osang angazükba agi, iba senden nungsa opposition lenirtemi West Bengal densema state kar nung Border Security Force (BSF) sepaitem jurisdiction ulushitsü takhangba agütsü.

Trinamool Congress lenir ana- Sudip Bandopadhyay aser Derek O'Brien nati aluyimertem atema minimum support price

(MSP) dak sendakba ozüng yanglutsü takhangba agütsü.

Senden nungsa opposition party aikati Lakhimpur Kheri tatalokba ken o dak sendakba nung Minister of State for Home, Ajay Kumar Mishra minister menden nungi anentsütsüla, ta takhangba agütsü.

Party ajak senden nung adenertem rongnung Congress party nungi Mallikarjun Kharge, Adhir Ranjan Chowdhury aser Anand Sharma nunger, DMK nungi TR Baalu aser Tiruchi Siva na, NCP nungi Sharad Pawar, Shiv Sena nungi Vinayak Raut, Samajwadi Party nungi Ramgopal Yadav, BSP nungi Satish Mishra, BJD nungi Prasanna Acharya aser National Conference lenir Farooq Abdullah nunger densema liasü.

Party ajak senden nung opposition party temisa coronavirus tashidak agi asür kibongtem nem teyari agütsütsü aser aluyimba ozüng tasen asem anema longkak aitdang asür aluyimertem kibongtem nem senotsü teyari agütsütsüla, ta takhangba agütsü.

Senden tembangba sülen osangbener den jembidang Rajya Sabha nung opposition lenir, Mallikarjun Kharge-i, "Onoki osettsüset nung jenjang atuba, gari totzü jenjang atuba, aluyimertem dak sendakba onüktem aser coronavirus wara densema tongtibang onük aika benoka liasü. Party ajaki MSP

atema ozüng ka yanglutsü takhangba agütsü," ta metetdaksü.

"Onokisa sorkar dang coronavirus tashidak agi asür kibong shia nem sen lakh pezüzü (4) teyari agüjang ta takhangba agütsü," ta Kharge-i metetdaksü.

"Tanü iba senden nung Ato kilonser, Modi adentsü ta onoki imlaa liasü saka kuli kar ajanga pa medentet. Sorkari item aluyimba ozüngtem agienogo saka Ato kilonseri, aluyimertem nem iba ozüng junga mangatetdaksü ta shiogo, anungji tarutsü nung item ozüng dak sendakba ozüngtem benoktsüa akok," ta paisa ashi.

Ano külen YSRCP lenir, Vijay Sai Reddy-i, taruba Parliament nung Women Reservation Bill benoktsüla, ta takhangba agütsü.

Parliament nung ozüng tasen 26 benoktsü sorkar tebilemba lir aser item ozüngtem rongnung aluyimba ozüng asem agientsü bill tama benoktsü.

Centre sorkarisa Crypto currency & Regulation of Official Digital Currency Bill, 2021-a benoktsü tebilemba lir, ta osang angazüker.

BJP aser Congress napronglai MP tem dang November 29 nü Parliament tenzüka anogo nung House anaprong nung ajak medema adentsü tuyuogo.

Hombarnü Parliament senden tenzüksü aser December 23 nü tembangtsü.

China-i anüdoklen Ladakh nung kiojen yangluba India-i ashishir

New Delhi, November 28 (Agencies): Tang China linüki Line of Actual Control (LAC) nung sepaitem atema kiojen aika yangluba anema India-i ola adoker.

China sepai- People's Liberation Army (PLA)-i anüdoklen Ladakh sector tipten sepaitem atema kiojen jenti yangludar.

Tawa linük ana senden amenba mapang nung India-i Chinese Army-i anüdoklen Ladakh sector anasa kiojen jenti yangluba atema ashishia liasü.

China nungeri LAC anasa highways tasen yangluba den lenmangtem sendaktepa yangludar aser kiojen yanglur, iba denji külemi missile densema raraba hadir jenti bendener.

China nunger sepaitemisa highways ulushia yanglur aser

tayimtsü anendak aika yanglur.

Parnokisa air force atema kiojentem yanglutsü aser itemji America nunger aser tanga satellites-i mangutsüsa yanglutsü tebilemba lir, ta osang angazüker.

PLA sepaitemi Tibet Autonomous Region kübok tesem aika nung missiles aser rockets bendendar aser kasa sector nung drones aika amshidar.

Iba dak sendakba nung India-ia Pakistan tsütsülen lemzüka aliba sepai aika aniteta arrtsülen aliba tenemtem nung lemzüksüogo.

Iba dak alia India-i asükwa mongpu nung temekong anema raratetsüsa sepaitem renemshiba den külemi IAF-i taruba ita trok atema sepaitemi nungdakba oset aika belentsüogo.



November 28, 2021 nü Gandhinagar nung milk powder plant ka aser Amul indang packaging plant ka semzüka sentong nung Union Home Minister, Amit Shah aser Gujarat Chief Minister, Bhupendra Patel na adenba noksa nung angur.

Omicron putetba linüktem nungi arurtem dak RT-PCR test agir

New Delhi, November 28 (Agencies): Coronavirus variant tasenba 'Omicron' putetba linüktem nungi aruba passenger tem dak Omicron RT-PCR test agi tenzükogo.

Amongnü anepdang nungi tenzüka Delhi nung aliba Indira Gandhi International airport nung UK densema Europe nung aliba linük kar, South Africa, Brazil, Bangladesh, Botswana, China, Mauritius, New Zealand, Zimbabwe, Singapore, Hong Kong aser Israel nungi arur passenger tem dak PT-PCR test agi tenzükogo.

Omicron variant kanga bulua putetba tesem asem - South Africa, Zimbabwe aser Hong Kong nungi tayimtsü ajanga arurtemi airport nung iba test agiba result atatsüsa akümtsü aser negative putetertem dang airport nungi aotsü melatsü aser positive putetertembo ajak Covid centres-i indangindanga yoktsü.

Ano tanga risk linüktem nungi arurtem test agiba result electronic osettem ajanga metetdaksüba sülen ang airport nungi yoktsü melatsü aser positive putetertembo Covid centres-i yoktsü.

Coronavirus variant tasenba putetba sülen iba tensa asadangtsü atema Amongnü anepdang sorkari senden ka ayongzüka menogo.

Variant tasenba ya Southern Africa nung tama putet iba sülen UK densema linük aika nunga putetdar. Iba variant prok tenzüka sülen linük aikati asentenshir tenokdangba balala benokogo aser linük karibo Africa nungi aruba tayimtsütem nokdangogo.

UK nunga November 30 nungi tenzüka bendanglen nungi arurtem atema ozüng tasenba benoktsü. Tayimtsü ajanga UK tonga aoertem dak PCR test agitsü aser negative report mangu tashi parnok kija alitsü.

'Omicron' dak sendakba nung Delhi Chief Minister, Arvind Kejriwal-ia Ato kilonser, Narendra Modi dang coronavirus variant tasenba putetba linüktem nungi India-i aruba tayimtsütem nokdangtsüla, ta takhangba agütsüogo.

Coronavirus variant tasenba nokdangtsü atema November 29 nü Delhi sorkari Disaster Management Authority (DDMA) senden ayongzüka agitsü.



November 28, 2021 nü New Delhi nung taoba mapang Union Minister, Vijay Goel leniba nung BJP züngsemtemi, Arvind Kejriwal-i aniba Delhi sorkari mopung menenba azüoktsü atema kecha meinyakteter, ta aija longkak aitba noksa nung angur.

China-i Tibetan party züngsemtem nem tenokdangba agütsü

Amdo, Yimpoksüi/ November 28 (Agencies): China-i, tamangba yimsü dak sendakba inyakyim balala nung shilem magitsü atema Tibet kübok Amdo province nung party züngsem aser cadre ajak nem tenokdangba agütsüogo, ta osang ajanga metetdaksü. Tibet nung tamangba yimsü dak sendakba nung tenokdangba agütsüba atema China aija arudar.

Iba mesükba tenokdangba ya October ita Golog prefecture nunga agütsüogo, kong Tibetan party züngsemtem Kora (circumambulation), rosary amshiba, digital prayer bead aser tanga tamangba yimsü dak sendakba osettem amishiba densema tamangba yimsü

inyakyim balala nung shilem magidaksütsü atema osang agütsürtem aika lir.

Tibet. Net sangdong ka ajanga ashiba agi, China nung ketdangsürtemi Tibet nung ketdangsürtem tamangba yimsü inyakyim nung shilem magidaksütsü atema tasa balala amshidar, kong parnok nija indang altars aser shrines tem dena agintsüba densema lir.

"Iba amala jenjang agiba ajanga Tibetan Party züngsemtem, parnok mulungka nung mesüi pei kidang nungi jurila Buddhist shrine aser altar tem agintsü nongshir," ta source-isa ashi.

Party züngsemtem tetuyuba sülen manidakba ngutetra parnok sorkar mapa nungi agintsü aser state-i agütsüba

tajangzük aser subsidy tem mangutsü akok.

Iba tesem nung RFA source-i ashiba agi, China nung ketdangsürtemi Tibetan Buddhist monastery temi nüburtem atsüa aruba nokdangtsü atema meranga arudar, koba Tibet nung sobaliba aser national maitsü lir.

China nung sepaitem 1950 kum Tibet atsünga liasü. 1959 Tibetan uprising mapang Tibet nung alirtem aser China nung sepaitem azütokshia rara adoka liasü.

China nung yimsüsüba anema nokdakba tamakok anguba sülen 14buba Dalai Lama India-i jena ao. Dalai Lama ya Tibetan Buddhist lenir lir aser pai India nungi sorkar amenoka liasü.

COVID tabu tasenba mechi Israel-i tenokdangba agütsür

Jerusalem, Yimpoksüi/Nov. 28 (Agencies): Bendanger linüki aitba ajunga nokdangtsü, ta Israel-i ashi, anungji tang coronavirus tabu tasenba mechi arütsü ajunga shibangba linük mezüngbuba akumer.

Ato Kilonser Naftali Bennett-i ashiba agi, iba tenokdangba ya sorkari ano temelaba magütsü aser ibai anogo 14 atema alitsü.

Iba mapang Omicron atema COVID-19 mozü indang tali tejangjaba metettsü ketdangsürtemi imlar. Omicron variant ya South Africa nung mezüng putet aser ibai "variant of concern" ka lir ta World Health Organization ajanga sangdong.

"Kuli teperi aser tejangja mongutetaka iba coronavirus tabu ya linük ajak nung lir amai angateter. Aser mozüi mapa inyakaka koba tashi teyari angur aji mejangja," ta Interior Minister Ayelet Shaked-i N12 indang Meet the Press nung ashi.

Iba tenokdangba ya Deobar aonung ayatirm nungi tenzüksü. Africa linük timba nungi bendanger aruba atema Hokulbarnü tenokdangba agütsür liasü.

Mejangjai aliba COVID-19 tabu tasenba den raratsü asoshi ozüng tasenba ya nungdaka liasü aser iba tashidak prokshia aoba nungi nokdangtsü atema jelia tenzüksü aser mera tesashi agitsü ya tajungba lir, ta COVID-19 dak sendakba nung sorkar nem shisa agütsüba tentet nung tekolakba, Dr Ran Balicer-i Israel indang Kan public radio dang ashi.

Iba COVID-19 tabu tasenba ya Malawi nungi meyipa shilanger ka dak jangjatet aser temolung melemi cases tenet bushisüngdangba mapang lir, ta Israel-i Honibarnü ashi. Nisung

tenet rongnung par asem COVID-19 mozü agir lir aser parnok ajak isolation nung lir.

"Special committee kati melaba dak alaka bendanger Israel-i aitba nokdang," ta ato kilonser indang office-i sangdong ka nung ashi.

Israel senso temi negative PCR test agütsütsüla aser vaccine agir lira asemnü quarantine asütsü aser vaccine magi lira tenetnü quarantine asütsü. Israel-i COVID mechi mapang talangka bendanger asoshi arütsü shibanger aliba lapoker hopta pezü ang jungogo.

Mera tasenba kübok Israel nungi linüki aiter vaccine agir alirtem dena quarantine asütsü nungdaker.

Iba variant tasenba dangar dak memenaloktsütsü mechi tashidak bona alir jangjatetsü atema Shin Bet counterterrorism agency indang phone-tracking technology amshitsü, ta Ato Kilonser Bennett-i ashi.

2020 kum March ita nungi mapang shia amshia aruba surveillance technology yagi virus bona alir senzüba aser anasa mobile phone aliba tem jangjateter.

Saka civil rights telok temi 'privacy' mechi anema nokdakba sülen Israel indang Supreme Court-i taküm talenba agütsü.

Iba Omicron variant tasenba ya Belgium, Netherlands, Botswana, Hong Kong, Italy, Germany aser United Kingdom nunga puteta lir aser alima ajunga nung tebilemstü kaa senzüsempongba nung tenokdangba agütsür.

Nütsüng yongsük million 9.4 aliba linük, Israel nung COVID-19 tashidak wara tenzükba sülen iba tashidak agi nisung million 1.3 menepogo aser nisung 8,000 dak tema süogo.

Omicron potetba atema tenokdangba agütsüba ya tim masü: SA



Pretoria, South Africa nung petrol attendant ka osangkaket anasa noksaka aliba noksa nung angur. Alima nung COVID-19 variant tasenba Omicron pokteta timtemba mapang South Africa nung scientist temi iba tashidak prokshia aoba nokdangtsü meranger. Omicron variant ya South Africa nung mezüng jangjateta liasü.

Cape Town, Yimpoksüi/ Novemeber 28

(Agencies): South Africa-i Honibarnü ashiba agi, Covid-19 variants tasenba kanga kara potettsüa parnok dak tashi aliba atema parnok merenshiogo. Iba tashidak potetba sülen linüktemi senzüsenpong nung tenokdangba agütsü, kechiyong Covid-19 Omicron variant yagi tourism aser rongsenketzüng nung tanga sector tem nung kongshitsü.

South Africa nung alima nung epidemiologists aser scientists tajungtibatem lir, shirnoki coronavirus variant tasenba aser iba mesen renloka aoba potetogo. Omicron variant ya mezüng South Africa nung potet aser iba sülen Belgium, Botswana, Israel, aser Hong Kong

nunga potetogo.

"Tawa senzüsenpong nung tenokdangba agütsüba ya South Africa indang advanced genomic sequencing aser variants tasenba takaratiba nung potettsüa tashi aliba atema merenshiba ama lir," ta Ministry of International Relations and Cooperation-i ashi.

"Temaba jenjang nung benshiba science atema tenüng asangtsüba ashi memerenshitsüla," ta kasa sangdong ajanga metetdaksü.

Linük aikati Hokolbar aser Honibarnü South Africa aser parnok meketa aliba linüktem nem senzüsenpong nung tenokdangba agütsüba liasü.

Foreign ministry-i ashiba agi, Covid variant tasenba ya tanga linüktem nunga potetogo, saka alima kintemi

Africa anüolen tip nung aliba linüktem nem tenokdangba agütsüba ama item linüktem nem tenokdangba magütsü.

Covid variant tasenba potetba ya South Africa nung scientist telok kati Bodhbarnü metetdaksü. Parnoki iba variant yagi temang nung immune response paitoktetsü akok aser takaratiba menatepyonga aotsü akok ta ashi.

"Tenokdangba agütsüba ajanga linük nung kibongtem, tourism industries aser shishilemba balala nung kongshitsü," ta South African Foreign Minister Naledi Pandor-i ashi.

SA Sorkari-i tenokdangba agütsür aliba linüktem den parnok jenjang asadangshitsü atema jembidar, ta kasa sangdong ajanga metetdaksü.

Ethiopia-i amakdang sepai aika asü: Sudan mitkar

Khartoum, Yimpoksüi/Nov. 28 (Agencies): Mangatetep aliba arütsülen Ethiopian sepaitemi amakdang Sudan sepai aika asü, ta Sudan mitkari ashi.

Honibarnü sangdong ka agütsüba nung Sudan mitkari ashiba agi, "Asen sepaitem Al-Fashaqa nung alu aroba anütsü yoka alidak Ethiopian army forces aser militia temi amak, shirnoki aluyimer amokmeren aser alu aroba mapang menentsü."

Sudan sepaitemi lendong agütsür meyipa yok aser Ethiopia tsütsü taküm aser osettsüset jenti akoksatsü, ta ashi.

Saka iba mapang Sudan sepai aika asü, ta ashi saka asürtem tejangja memetetdaksü.

Iba lendong nung sepai trok asü, ta mitar osang ka ajanga ashi. Iba atema Ethiopia ketdangsür nungia osang kecha agütsü mali.

Al-Fashaqa ya arütsülen mapang talangka nungi Ethiopia

aluyimer temi alu yima arur saka Sudan-i par indang ta ashir.

Iba tesem ya Ethiopia nung timtem aliba Tigray region den arütsüa lir aser tesüiba mapang yangji linük ana tsüngta mapang shia azüdokshia aru saka taoba kum tensa tamajungba akum.

2020 kum November ita rara tenzükba sülen tensa tamajungba akum aser refugée meyrirjang aika Sudan nung oa jenok.

Iba sülen Khartoum aser Addis Ababa tsüngta iba region atema o agi raratepa aru aser yangji azüdokshiba aser arütsü nung timtem adokba tai tongloksütepa arur.

Arütsü mechi mangatetep adokba ya tuluba kuma Ethiopia-i Blue Nile nung Grand Ethiopian Renaissance Dam tashinung kongshi.

Egypt den külemi Sudan-i iba tzünokdang atema kum ter dak tema mangatetep adoka lir.

Iba tzünokdang tsünglanglen aliba linüktem timba iba ayong nung metaloka alir aser ibai timtem ka amai züngshir.

Antim: The Final Truth sayar tanünübuba nung cr.10 aazükogo

Mumbai, Yimpoksüi/ November 28, 2021 (Agencies): Aayush Sharma aser Salman Khan nati tongti shilem agiba film - Antim: The Final Truth sayar külen nungi critics aser box office ajanga telangzüba tajung nguogo. Honibarnü, iba film ajanga mezüing anogo dang nungi sen timba aazüka liasü aser anogo ana nung film ajanga sen cr. 10 jungnüa aazüka lir.

Hokolbarnü, iba film sayaa liasü aser mezüing anogo box office nung cr 4.25-4.5 shi aazük. Tanünübuba (Honibar) nung iba film ajanga sen cr. 5.25-5.5 aazükogo. John Abraham-i tongti shilem agiba film - Satyameva Jayate 2 sayar anogo ka lir Antim saya liasü.

Boxofficeindia.com sangdong ka ajanga angazükba

agi, "Honibarnü, 'Antim: The Final Truth' ajanga mezüing anogo dang nungi timba (cr. 5.25-5.50) aazüka liasü. Mezüing aser tanünübuba nung sen aazükba tetsüingda kanga mali, saka tera agi timba aazükba film atema kanga tongtibang. Iba amala film sayar tanünübuba nungbo box office nung tajemba aazüker," ta metetdaksü.

"Anogo ana tashi iba film takok ngua sayaogo aser taruba anogotem nunga timba aazüküsü imlar, kechiyong film nung shilem agirtemi masü saka film otsü ajanga audience tem atsüa arutsü maongka lir. Honibarnü, box office nung timba aazük asünung, Deobar anogo iba dang nungi ano timba aazüküsü akok," ta kasa sangdong nung shia lir.

Salman Khan fans tem film tasenba nung benjongtepba mapang, fans kari theatre telung nung 'firecrackers' pokshishiba osang angazüker.

Iba dak sendakba nung, Salman-i fans dang theatre nung fire crackers mamshitsü asoshi mepishiogo.

"Auditorium telung nung fire crackers mapoktsü asoshi fans dang mepishir, kechiyong pei taküm aser tangar asoshi iba ya lendong asütsü akok. Theatre kiburtemi cinema telungi fire cracker tem bener aruba nokdangtsü asoshi mepishir aser entry point nung security temi fire crackers nokdangtsüla. Pei jangraba ama film reprangang, saka tim masüba mapa meinyaktsü asoshi fans ajak dang mepishir," ta Salman-i lemsatpep.

Dimapur nung nübudok mapa ayongzük



Dimapur, Yimpoksüi/ November 28, 2021 (TYO):

Honibarnü, Chümoukedima Town nungi tenzüka Purana Bazaar (National Highway 29) tashi Cleanliness Drive/Social Work ayongzükba liasü, ta sangdong ajanga metetdaksü.

Iba nübudok mapa/merükmejuba drive nung ward aser yimtsüing balala nungi

lennirtem den Chamber of Commerce Chümoukedima Town, East Dimapur Business Association, Youth/Student Organisations aser nübur aikati shilem agiogo.

Lenmang nung janatem bendenba den külemi lenmang nung lisem tokshir aliiba ajak merüktetta/okdena liasü, ta kasa sangdong nung shia lir.

Sangküm July 15 nung 'Cirkus' sayatsü

Mumbai, Yimpoksüi/ November 28, 2021 (Agencies): 'Sooryavanshi' takok ngua sayaba sülen, Ranveer aser director Rohit Shetty indang taruba film ya sangküm July 15, 2022 nü theatre nung sayatsü sentong lir.

Indian film critic aser movie trade analyst Taran Adarsh-i Instagram sabang nung iba osang jangjatsü.

"Director #RohitShetty aser #RanveerSingh na indang film tasembuba - 'CIRKUS' ya 15 JULY 2022 nung sayatsü. #Simmba aser #Sooryavanshi sülen Cirkus ya Ranveer aser Rohit na indang project tasembuba asütsü. Iba film nung #JacquelineFernandez, #PoojaHegde aser #VarunSharma nung dena lir," ta Taran-i lemsatpep.

Cirkus, koba Shakespear indang jilushi - 'The Comedy of Errors' nung ajemdaker yangluba film ka asütsü, iba film nung Ranveer dak alaka Pooja Hegde, Jacqueline Fernandez, Varun Sharma, Johny Lever, Sanjay Mishra aser tanga cast temi shilem agiba angutsü.

Shetty, shibai 'Cirkus' film direct aser produce asütsü, iba project atema pai Bhushan Kumar den mezüing longjemer inyaksü renemdar. Iba film nung Ranveer Singh-i 'double role' agiba mezüing angutsü.

Maneni, sangdong tanga ka nung, Katrina Kaif, Siddhant Chaturvedi aser Ishaan Khatter nungeri tongti shilem agiba horror-comedy 'Phone Bhoot' ya sangküm July nung sayatsü.

'Mirzapur' direct asüsang Gurmmeet Singh-i yangluba film

ya July 15, 2022 nü sayatsü. Katrina, Ishaan aser Siddhant nung iba project nung külemi shilem agiba mezüing angutsü.

Farhan Akhtar aser Excel Entertainment ajanga iba project produce süogo. Iba film indang mezüing poster ya taoba küm sayaa liasü.

Iba film dak alia, Kaif-i 'Jee Le Zaraa' nung Priyanka Chopra Jonas aser Alia Bhatt; aser 'Tiger' franchise tasembuba nung Salman Khan den külemi shilem agiba angutsü.

Ano külen, Siddharth Chaturvedi-i romantic action-thriller 'Yudhra' aser film tanga ka nung film yanglur Shakun Batra o Deepika Padukone den külemi shilem agiba angutsü. Khatter-ia war-drama 'Pippa' nung shilem agitsü terenemba lir.

Valerie-i Pet Fashion Show kokogo



Dimapur, Yimpoksüi/November 28, 2021: Pet Fashion Show takok angur - 'Valerie' den kibur Lolano Patton, tetendangerterem aser Marcus o Dainty den kibur tangokba noksa ka yangi angur.

Dimapur, Yimpoksüi/ November 28, 2021 (TYO):

Society for the Prevention of Cruelty to Animals (SPCA), Dimapur ajanga anogo ana tashi ayongba Pet Winter Fest sentong Deobarnü tembangogo. Dimapur Government College Ground nung iba show sentong ayongzükba liasü aser Nagaland nung iba ama sentong ya mezüing asütsü, ta sangdong ajanga metetdaksü.

Iba show sentong tanünübuba nung azü metsü (dog breed) balala 30 tashi sübosülemtsü balala semer toktepa liasü.

Fashion show tetoktepa nung, 'Pink Bride' ama sobur

aliba azü - Valerie-i takok angur kasa tetoktepa nung 'Marcus' aser 'Dainty Cuddles' nati tanabuba aser tasembuba jenjang nguogo.

Iba show atema tetendanger temji Dr Abeny Khuvung, Stephen Lotha aser Azungla Imsong nung liasü. Takok angurtem nem gift hampers, vouchers aser senpet agütsü. Iba den külemi, show nung shilem agir ajak (30) nem gift hampers agütsüogo.

Rescue Van ka alitsü aser tanga maparen atema iba fest sentong ayongzükba liasü.

Iba sentong nung Naga artists balalai shilem agiogo, ta kasa sangdong nung shia lir.

Rotary Club Mokokchung-i Health Camp ayongzük



Mokokchung, Yimpoksüi/ November 28, 2021 (TYO): Honibarnü (27.11.2021) Indian Red Cross Society, Mokokchung District Branch aser Medical Dept. nungi teshimtet nübu den longjemer Rotary Club Mokokchung-i Akuluto Town nung Health Camp ka ayongzükba liasü, ta

sangdong ajanga metetdaksü. PHCAkuluto nung Medical Officer aser par staff den Additional Deputy Commissioner Akuluto, Imsenperong Wati-i anir administration teyari agia iba Camp achaayanga liasü.

Mokokchung nungi Doctor 9 den Optometric Assistant temi

dept. talisa Gynae, Paediatrics, Eye, Dental aser general medicine balala kübok manemer (patient) 300 jungnüa reprangogo/anepaluogo. Iba den külemi Camp nung adener ajak nem angati tejak nembangba mask lema agütsüogo, ta kasa sangdong nung shia lir.

Kohima DC ajanga metetdaksür

Kohima, Yimpoksüi/ November 28, 2021 (TYO): Nagaland Sorkar tetuyuba nung

anidaka aser December 01, 2021 nü Statehood Day benjungmung aser aruya aliba Hornbill Festival dak sendakba nung, Deputy Commissioner Kohima Gregory Thejawelie NCS-i sangdong ka ajanga, Kohima district nung State Sorkar tenzüka wadang nung inyaker, ward/colony/yimtsüing nung tekolakpur aser nübur ajak dang November 30, 2021 (Mongolbar) anepdang 6:00 ako nungi tenzüka nübudok mapa inyaksü, ta metetdaksü.

Kohima district kübok Ward/colony/yimtsüing ajak dang pei pei tata Ward/colony/yimtsüing tem nung pei aliba temeküt tesem, kima yimdong tem

merüktettsü asoshi kasa sangdong nung tetuyuba agüja lir.

Iba den külemi, lenmang nung kisüjensü dang amshiba osettsüsettem ayuba/jana/garitem anena ayuba ajak agientsü/merüktettsü asoshi nübur dang metetdaksür. Teyuba ama kiburtemi pei osettsüset/gari tem magienra kibur khuret asütsü.

Maneni, November 30, 2021 tashi nung Kohima District kübok Sorkar building ajak nung 'decorative lights' inoktsüla. Iba den külemi nüburtem, Arogo balala aser shishilembaba tesem ajak nung November 30, 2021 tashi pei pei tesem merüktettsü aser 'decorative lights' yoktsü asoshi mepishir, ta kasa sangdong ajanga metetdaksü.

Inter-Dept Badminton Club-i badminton asayamung ayonga asaya



Kohima, Yimpoksüi/ November 28 (TYO): Inter-Department Badminton Club-i ayongzuka mezüngbuba asayamung Honibarnü Grand Vista Arena Badminton stadium, Meriema nung asayaogo.

Club sangdong ka ajanga ashiba agi, iba asayamung tebur

tarep asaya Kekhriesetuo Ziephrü aser Kelhikha Kenye nati akok aser Shanavas C aser Sabou Yashü na runner up liasü.

Iba asayamung nung tebur tarep asaya dang asayaa liasü.

Maneni Club-i, züngsem 12 agi kumtetba club ya 2020 kum tentet, kong department balala nungi sorkar ketdangsürtem

densema lir. Club ya fitness jenjang ajungkettüsü nukjidong nung tenzüka liasü, ta ashi.

Iba club nung züngsemtem ya arishi kum 30 temapur dang lir.

Tawa club-i Kohima district atema 1buba Inter dept Badminton tourney ayongzuka asayaogo.

Cummins dang meim ken o kar danga lira metetdaksütsü ashi

Yimpoksüi/November 28, 2021 (Agencies): Tawa shimba Australia Test captain Pat Cummins dang captain mapa magütsü tsüingda selection panel-i, meim ken o kar danga lira metetdaksütsü shia liasü.

'Sexting scandal' dak sendakba nung Tim Paine-i captain mapa toktsüba sülen Ashes series metenzük tsüingda Cummins ya Australia indang Test captain 47buba kumogo.

Kasa mapang nung taoba captain Steve Smith nem vice-captain mapa agütsüogo. 2018 kum ball-tampering ken o nung kum ka atema asaya nung shilem magütsü tenokdangba agütsüba sülen kum asem lir Smith nem iba mapang agütsüogo.

Cricket Australia-i, captain mapa magütsü tsüingda meim ken o lemsateptsü ashi asü, ta asüingdangba mapang

Cummins-i auh langzü. "Auh tasüingdangba kar asüingdangba. Ajisüaka ni tatongi meshile," ta Cummins-i ABC sport dang ashi.

"Sensaksem sadok sadoka kaogo. Onok onük balala aika benoka sensaksemogo. Anungji künaprongla kanga temulung süa liasü," ta paisa ashi.

Captain shimba panel nung selectors George Bailey aser Tony Dodemaide, taoba Australia batter aser tangCA board member Mel Jones, CEO Nick Hockley aser chair Richard Freudenstein nung densema liasü.

Cummins, Josh Hazlewood aser Mitchell Starc nung ICC T20 World Cup nung shilem agiba ajanga Australia team Ashes atema renemshitsü mapang aikabo mali.

Ajisüaka Australian bowling coach Andrew McDonald-i, pace bowling unit nungi excuse kecha magizüksü, ta shiogo.

Asian Champions Trophy 2021 nung Manpreet-i anir India team asayatsü

New Delhi, Yimpoksüi/ November 28 (Agencies): Olympic nung bronze medal ngur aliba captain Manpreet Singh-i anir Indian men's hockey team (züngsem 20 - goalkeeper PR Sreejesh maden)-i taruba ita Dhaka kübok Asian Champions Trophy nung shilem agütsü.

Iba asayamung atema Captain Manpreet nem star dragflicker Harmanpreet Singh-i vice-captain ama teyari agütsütsü. December 14 nungi 22, 2021 tashi iba asayamung asayatsü.

Taruba hockey asayamung atema squad, koba Tokyo Olympics sülen India hockey team pur mezüng asayamung asütsü, iba squad nung tejak tasen aika anioka lir.

Goalkeeper tejen PR Sreejesh anisüingzüker asünung, pa melen Krishan Bahadur Pathak aser Suraj Karkera na asayatsü.

India team defence nung Harmanpreet-i anir Gurinder Singh, Jarmanpreet Singh, Nilam Sanjeep Xess, Dipsan Turkey, Varun Kumar aser Mandeep Mor nung asayatsü.

Mid-field nung Manpreet-i anir Hardik Singh, Jaskaran Singh, Sumit, Rajkumar Pal, Shamsher Singh aser asayar tejen Akashdeep Singh nung dena lir.

Lalit Kumar Upadhyay-i anir Dilpreet Singh, Gursahibjit Singh aser Shilanand Lakra nung 'forward' asayatsü.

Iba campaign tenzüka, defending champion India team mezüng Korea team den asayatsü. Iba asayamung nung Japan, Malaysia, Pakistan aser tayonger Bangladesh asayatsü terenemba lir.

Asian Champions Trophy atema squad indang jembiba mapang, chief coach Graham

Reid-i, "Iba team shimba mapang, tarutsü atema asadanga inyakogo. Takok angütsü asoshi kanga bilemdangtsüla aser team tajung shimtsüla, ajiasünungang asayartem shilem agütsü asoshi maongka agütsütsü. Asayar tejen aser tejak tasen meyoktepa onoki team ka shimogo, kong parnok sempet sayutsü asoshi maongka asütsü," ta ashi.

"Team tajung den asayatsü asoshi lemküjka lir aser COVID tensa asadanga, FIH aser AHF ajanga game shia nung squad 20 nungi asayar 18 dang melaogo," ta pai ashi.

December 14, 2021 nü India team-i Korea den asayatsü. Iba sülen Bangladesh (December 15), Pakistan (December 17), Malaysia (December 18) aser Japan (December 19) den asayatsü terenemba lir.

Semifinal December 21 nü asayatsü latetja lir aser tasüingnü final asayatsü.

Taoba Asian Champions Trophy ya Muscat, Oman nung asaya liasü aser final nung tzünglu kanga aruba ajanga asaya thinena liasü aser India o Pakistan naprongla nem iba title agütsü.

* Indian men's hockey team - Goalkeepers: Krishan Bahadur Pathak, Suraj Karkera.

- Defenders: Harmanpreet Singh, Gurinder Singh, Jarmanpreet Singh, Dipsan Turkey, Varun Kumar, Nilam Sanjeep Xess, Mandeep Mor.

- Midfielders: Hardik Singh, Manpreet Singh (capt), Jaskaran Singh, Sumit, Rajkumar Pal, Akashdeep Singh, Shamsher Singh.

- Forwards: Lalit Kumar Upadhyay, Dilpreet Singh, Gursahibjit Singh, Shilanand Lakra.

World Championship nung Mirabai Chanu masayatsü

New Delhi, Yimpoksüi/ November 28 (Agencies): Olympic nung silver medal ngur aliba weightlifter Mirabai Chanu-i taruba World Championship aser Commonwealth Senior Championship nung shilem magütsü. Iba Championship anaprongla December 7 nungi 17, 2021 tsüingda Tashkent, Uzbekistan nung atonga asayatsü.

Chanu, shibai taküm Tokyo Olympics - women's 49kg category weightlifting nung silver medal ka angu, la ya taoba mapang world champion ka lir. India head coach Vijay Sharma tetuyuba nung Chanu-i asayamung anaprongla nung shilem magütsü lemet.

"Sangküm Commonwealth Games atema asayartem world championship aser Commonwealth Senior Championship nung asayadaksütsü onok nukjidong lir," ta Sharma-i ashi.

"Onoki Mira indang entry yokogo, saka tang la indang 'performance' bilemba ama masü. La indang 'snatch technique' tera tajungba melenshitsü asoshi onok inyakdar. La qualification (CWG) atema tebilemstü kangarabo mali, kechiyong Olympics nung lai silver medal ngua lir aser tang la World no. 1 nung lir," ta pai shisem.

Commonwealth Senior Championship ya Singapore nung October 20 nungi 24, 2021 tashi asayatsü renem, saka Covid-19 tensa ajanga iba asayamung thinena liasü. Youth Olympic nung gold medal ngur aliba asayar Jeremy



Lalrinnunga densema linük nungi weightlifter 20 iba asayamung nung tokteptsü.

Chanu, shibai taoba kum Asian Championship nung '119kg' ajungketba sülen, 49kg category - 'clean and jerk event' nung world record bena lir, lai snatch section nung China tsür den tokteptsü asoshi timtema liasü.

Chanu-isa, Dr. Aaron Horschig, (taoba mapang weightlifter, shiba US nung physical therapist and strength and conditioning coach agi melen) teyari agia liasü. Aaron teyari ajanga Chanu-i Tokyo Olympics nung silver medal angu.

Training atema Chanu US-i aotsü bilema lir asüing ta asüingdangba mapang, Sharma-i, "Tangbo la US-i aotsü nüngdak madoker," ta telangzüba agütsü.

Sharma-i ashiba agi, world

championships nung lai shilem magü anisüingzüksü telemtetba agiogo. Tang tashibo la temang nung timtem kecha Mali, saka la koba asayamung nung shilem agütsü aser magütsü iba indang onoki asalentong yangludar. Tesüiba kum pungo tsüingda tetoktepa balala nung lai shilem agia arudar. Onoki renema lir, saka iba asayamung atema ibaji teperi masü. Iba asayamung nung lai shilem agira la kanga belemstü asünung, onoki la dang iba asayamung nung masayatsü tetuyuba agütsü."

Ajisüaka, taoba ita interview ka nung, Chanu-i 'weight' taret ajungshiba mapang la temang nung ano timtem adokba/ayang ashiba aliba metetdaksü.

"Iba timtem nungi taneptsü nguogo, saka tapubang achjilen ayangashi anosa lir. Ajisüaka, taoba mapang dang nungi tang tejungtuba," ta lai ashi.

"Tangbo, US-i aotsü bilema mali, kechiyong December ita World Championship asayatsü. Iba sülen, taruba Games atema onoki asalentong yanglutsü akok. Online ajanga pa (Horschig) den jembitsü," ta lai ashi.

Asian Championship nung gold medal ngur aliba asayar Jhilli Dalabehera, shibai taoba mapang 45kg category nung shilem agiogo, lai aruya aliba Championship nung India tenüng nungi Chanu indang category nung tokteptsü.

BILEMDANGANG

"Timtem terokrong sülen tepela tesünep arur."